

ԳՐԱԿԱՆ ԺԱՆՐԵՐԸ 12-ՐԴ ԴԱՐԻ ԶԵՌԱԳԻՐ ՄԱՏՅԱՆՆԵՐՈՒՄ

Բանալի բառեր. ձեռագիր, ժանր, պատմագրություն, թուղթ, ներքող, հիշատակարան, գրիչ, վանք:

Ключевые слова: рукопись, жанр, историография, послание, ода, колофон, переписчик, монастырь.

Keywords: manuscript, style, historiography, epistle, ode, colophon, scribe, monastery.

Գրական ստեղծագործությունները իրարից տաբերվում են ոչ միայն իրենց պատմական ու գեղարվեստական բովանդակությամբ, այլև բուն իրենց տիպով՝ տեսակներով: Գրական տեսակներ և ժանրեր հասկացությունները հաճախ գործածվել են որպես հոմանիշներ: Հայտնի է, որ յուրաքանչյուր գրական ժանր ունի իրեն հատուկ կառուցվածքը, օրինաչափությունը, իրական երևույթների գեղարվեստական արտացոլման յուրահատուկ եղանակները: Իսկ թե ի՞նչ գրական ժանրեր են ընդգրկված 12-րդ դարից մեզ հասած ձեռագրերում, կիմանանք այս հետազոտության ընթացքում: Մաշտոցի անվ. Մատենադարանում է պահվում 12-րդ դարից մեզ հասած շուրջ 68 ձեռագիր¹, որոնցում ընդգրկուած են տարբեր ժանրերի գործեր:

Այսպես, պատմագրությունը հայ գրականության հնագույն ժանրերից է, այն ձևավորվել է դեռևս հինգերորդ դարում: Այն մի համադրական ժանր է, որն իր մեջ է ամփոփում պատմականն ու գեղարվեստականը: 5-րդ դարից մեզ հասած առաջին պատմությունը Ագաթանգեղոսի երկն է, այն կոչվում է «Հայոց պատմություն», որը նվիրված է քրիստոնեության մուտքին և մեր երկրում այն որպես պետական կրոն հռչակելուն: 12-րդ դարի հ^մ 5583 ձեռագրով մեզ է հասել Ագաթանգեղոսի Պատմությունը: Տարբեր ձեռագիր-ժողովածուներով մեզ են հասել բազմաթիվ պատմություններ. այսպես՝ հ^մ 1888 ձեռագրում տեղ է գտել Եղիշեի պատմությունը հետևյալ խորագրով.

¹ Ձեռագրերի համարները՝ 3906՝ Ներսես Շնորհալի, Թուղթ ընդհանրական, 5583՝ Ագաթանգեղոս, Պատմություն, 1568, 4035, 5939՝ Գրիգոր Նարեկացի, Մատենան Ողբերգության, 1890, 975, 948, 468, 777, 1672, 1888, 1897, 2244, 5551, 5619, 6362, 9838, 5561, 5607՝ Ժողովածուներ, 3777, 7729, 3782, 1522, 9296՝ Ճառընտիր և այլն:

«Պատմութիւն սրբոյն Վարդանայ քաջի եւ հայոց սպարապետի եւ վկայի Քրիստոսի, յԵղիշայէ, սրբոյ Դաւթայ երիցուէ հայցեալ գրեաց»²: Հ^մ 948 ձեռագիրը Ճառնտիր է, որի ստացողը և գրիչը Յովհաննէս քահանան է, այս ձեռագրի միջոցով մեզ են հասել. «Վասն Եփրեմի Ասորոյ», «Վասն կնոջն այրոյ», «Վասն Յովսէփայ բժշկի» խորագրերով պատմությունները³:

Հ^մ 1522 ձեռագիրը Ճառնտիր է, գրված Հովհանավանքում, գրիչը Հովհաննէսն է, ստացողը՝ Ռուբեն քահանան: Այս ձեռագրով 12-րդ դարում մեզ հասած պատմություններն են. «Պատմութիւն վարուց սրբոյն Յակովբայ Մծբնա հայրապետի, որ գրեաց Մեղիդէ աշակերտ Մարուգէի միայնակեցի»⁴, «Պատմութիւն սրբոյն Բագրատայ Տոռմունի եպիսկոպոսի ի Սիկիլիդոյ կղզւոջն»⁵, «Պատմութիւն սրբոյն Կիպրիանոսի եպիսկոպոսի եւ Յուստինէա կուսի, եւ վկայութիւն նոցա»⁶, «Պատմութիւն վասն անցից ի հարաւային ազգէն ի վերայ Հայոց, եւ վկայութիւն Վահանայ, որդւոյ Խոսրովու Գողթան տեառն»⁷, «Պատմութիւն յաղագս Սրբոյ խաչին, որ Հացունեան կոչի, եւ թէ որպէս դարձաւ ի Պարսից աշխարհէն Խաչն աստուածընկալ եւ յայնժամ մասն ընկալեալ տիկնոջն»⁸:

Հ^մ 1890 ձեռագիրը ժողովածու է գրուած 1172 թվականին Կոշավանքում. գրիչը և ստացողը Դաւիթ կրօնավորն է: Ժողովածուն պարունակում է Եղիշէի պատմությունը՝ «Պատմութիւն սրբոյն Վարդանայ քաջի եւ Հայոց սպարապետի եւ վկայի Քրիստոսի յԵղիշայէ, սրբոյ Դաւթայ երիցու հայցեալ գրեաց»⁹, Թովմա Արծրունու պատմությունից՝ «Ի պատմութենէ Թովմայի վարդապետի»¹⁰, եւ հետևյալ խորագրով պատմությունը՝ «Պատմութիւն վարուց սրբոյն Յակովբա, զոր գրեաց Մելիքէ աշակերտ Մարուգէի միայնակեցի»¹¹:

Գրիգոր Նարեկացուց մեզ հասած լավագոյն և կարևորագոյն ստեղծագործությունը, ինչպէս գիտենք, «Մատենան ողբերգության» պոեմն է, որ կոչվում է նաև «Նարեկ»: 12-րդ դարի երեք առանձին ձեռագրերով մեզ է հասել Նարեկացու «Մատենան ողբերգութեան» աղոթամատյանը: Այսպէս.

² Ձեռ. հ^մ 1888, թերթ 3ա:

³ Ձեռ. հ^մ 948, թերթ 155ա-161ա:

⁴ Ձեռ. հ^մ 1522, թերթ 21բ:

⁵ Նույն տեղում, թերթ 74բ:

⁶ Նույն տեղում, թերթ 164բ:

⁷ Նույն տեղում, թերթ 182բ:

⁸ Նույն տեղում, թերթ 521բ:

⁹ Ձեռ. 1890, թերթ 3ա:

¹⁰ Նույն տեղում, թերթ 206բ:

¹¹ Նույն տեղում, թերթ 238ա:

հ^մ 1568 ձեռագիրը, որի թերթերը մագաղաթ են, պահվում է Մաշտոցի անվ. Մատենադարանում, գրվել է 1173 թվականին, ինչը հաստատվում է ձեռագրում առկա հիշատակարանով. «ԶՎարդան աստուածամերձ քահանայ, որ բարիոք ծերութեամբ հանգաւ ի Քրիստոս յիշեսցիք. թու[ին] ՈՒԲ. (1173)»¹², գիրը երկաթագրախառն բոլորգիր¹³ է և միասյուն, հավանաբար ընդօրինակվել է Սկևռայում, գրիչն է Գրիգոր Սկևռացին, կասկածվում է, որ ծաղկողը նույնպես ինքն է, ձեռագրի ստացողն է Ներսես Լամբրոնացին¹⁴: Սա առաջին ձեռագիր մատենան է, որով մեզ է հասել Նարեկացու երկը, այն օգտագործվել է Պ. Խաչատրյանի եւ Ա. Ղազինյանի քննական բնագրում, որպէս A ձեռագիր: Այս ձեռագրում աղոթամատյանը այսպէս է խորագրված՝ «Ասացեալ Մատենան ողբերգութեան Գրիգորի Նարեկեայ վանաց վանականի, հոգեմատենան հոետորի եւ Հայոց փիլիսոփայի»¹⁵: 12-րդ դարի մյուս ձեռագիրը, որով մեզ է հասել Նարեկացու երկը, հ^մ 4035-ն է. պահվում է Մաշտոցի անվ. Մատենադարանում, թերթերը թուղթ են, գրված է ուղղագիծ երկաթագրով¹⁶ միասյուն, գրիչը համարվում է Գրիգորը, իսկ ստացողը՝ Կոստանդինը: Երրորդը՝ 5939 համարի ձեռագիրն է, գրված բոլորգրով, միասյուն, գրիչը համարվում է Մանուէն, ստացողը՝ Յուսիկը:

Ներքողը, որի ակունքները գալիս են դեռ Հին Հունաստանից, հայերեն նշանակում է գովեստ, գովք, գովասանք միջնադարում կրել է ներքողյան անունը: Ներքողի ժանրը հայ գրականության մեջ սկզբնավորվել է դեռ 5-րդ դարից, շարունակվել է միջնադարում: Առաջին ներքողագիր հեղինակներ են համարվել Մովսես Խորենացին և Դավիթ Անհաղթը: 12-րդ դարի ձեռագիր մատյաններով մեզ են հասել հետևյալները. «Գօշի Ներքողեան ի նոր վկայն Խոստրով» ներքողը՝ հ^մ 3777 ձեռագրով՝ գրուած 1185-1188 թվականներին՝ հավանական է, որ գրվել է Սաղմոսավանքում, գրիչը, կազմողը, ստացողը համարվում են Մարկոս, Մխիթար եղբայրները, ստացող է համարվում նաև Ստեփանոսը: Մյուսը՝ 3782 համարի ձեռագիրն

¹² Ձեռ. հ^մ 1568, էջ 132ա:

¹³ Հայկական գրատեսակներից, որը հատուկ է երկաթագրից բոլորգրին անցման շրջանին, այն կարելի է անվանել նաև անցման գիր – Օվսաննա Խաչատրյան:

¹⁴ Մայր ցուցակ հայերեն ձեռագրաց, հտ. Ե, Երեւան 2009, էջ 497-506:

¹⁵ Ձեռ. հ^մ 1568, թերթ 8ա:

¹⁶ Այն որպէս գրատեսակ սկսել է գործածվել դեռևս 8-9-րդ դարերից. այս տառատեսակը բուն մեսրոպյան բոլորգիծ երկաթագրից, որի տառաձևերը կորույթուն ունենին, տարբերվում է ուղղագիծ անկյուններով և նախկին գրին զիջում է իր չափերով: Ավելի մանրամասն տե՛ս Աբրահամյան Ա. Գ., հայոց գիր և գրչություն, Երևան, 1973, էջ 61-70:

է, որով մեզ են հասել բազմաթիվ ներբողներ (Բարսեղ, Դաւիթ, Մովսէս Խորենացի, Եփրեմ, Զաքարիա կթղ., Ոսկեբերան): Ներբողի գլխավոր հատկանիշն այն է, որ այն բարի գործերի, գեղեցիկ արարքների գովերգումն է. «Ներբողը բարի գործերի, առաքինության, գեղեցիկ հատկանիշների գովերգությունն է»¹⁷:

Թուղթը, որպէս գրական տեսակ ձևավորվել է 5-րդ դարում: Թուղթ նշանակում է նամակ, որը նպատակաուղղված է. «Թուղթ ունի նաև հրովարտակ իմաստը, վերջին հաշվով հրովարտակը նույնպէս նամակ է՝ միայն ոչ անձնական, այսինքն՝ կոնկրետ մի մարդու ուղղված...»¹⁸ : Ահա 12-րդ դարում հ^մ 3906 ձեռագրով մեզ է հասել Ներսէս Շնորհալու «Թուղթ ընդհանրական»-ը՝ գրված 1169-1170 թթ., բոլորգրով, միասյուն, հ^մ 1522 ձեռագրով՝ «Թուղթ առ Ներսիսէ եղբար տեառն Գրիգորիսի կաթողիկոսի Հայոց. Պատասխանի թղթոյն Գեորգայ արեւելյան եպիսկոպոսի, առաջնորդի Սուրբ ուխտին Հաղբատա, յաղագս հետազոտելոյ առ ի ստուգութիւն զՊատմութիւն երանելոյ նահատակի սրբոյն Սարգսի զարավարին Մեծի»¹⁹, հ^մ 3782՝ Ճառնոտիւր ձեռագրով մեզ են հասել բազմաթիվ թղթեր (Գր. եպս. Արծրունեաց, Դիոն. Արիսպագացի), հ^մ 1890 ժողովածու ձեռագրով հետևյալները՝ «Ստորոգութիւն պատմութեան սրբոյն Սարգսի զարավարի, թէ ուր վկայեալ, կամ որպէս թարգմանեալ բերաւ ի մեզ: Թուղթ Ներսիսի եպիսկոպոսի՝ եղբար Գրիգորի եւ կաթողիկոսի Հայոց՝ պատասխանի թղթոյն Գեորգայ արեւելեան եպիսկոպոսի, առաջնորդի սրբոյ ուխտին Հաղբատայ՝ յաղագս հետազոտելոյ առ ի ստուգութիւն զպատմութիւնս երանելոյ նահատակին սրբոյն Սարգսի»²⁰:

Միջնադարում գոյություն ունեցող յուրօրինակ գրական երևույթներ են ձեռագրերի հիշատակարանները, որոնք արձակ կամ չափածո ձևով են հանդես գալիս և տեղեկություն են հաղորդում տվյալ ձեռագրի գրչության վայրի, թվականի, ձեռագրի գրչի, ստացողի, ծաղկողի մասին, օրինակ՝ կարդալով հ^մ 1568 ձեռագրի հիշատակարանը՝ հասկանում ենք, որ տվյալ ձեռագրի ստացողը Ներսէս Լամբրոնացին է. «Ստացող սորա զՆերսէս աստուածամերձ քահանայ յիշեսցի՝ ք եւ զգրիչս՝ աղաչեմ»²¹, կամ կարդում

¹⁷ Արշալույս Ղազինյան, Ներբողը հայ հին գրականության մեջ (տե՛ս Հայ միջնադարյան գրականության ժանրեր, էջ 130):

¹⁸ Դոլուխանյան Աելիտա, Հայ միջնադարյան գրականության հիմնական ուղղություններն ու ժանրերը, էջ 35:

¹⁹ Ձեռ. 1522, թերթ 296բ:

²⁰ Ձեռ. 1890, թերթ 211ա:

²¹ Ձեռ. 1568, թերթ 118բ:

ենք հետևյալ հիշատակարանը և իմանում գրչի անունը՝ «Զողորմելի գրիչս Գրիգոր աղաչեմ յիշել ի Տեր»²²:

Հիշատակարանների բազմազանությամբ և հարստությամբ հայերեն ձեռագրերը զգալի տարբերվում են այլ ժողովուրդների ձեռագրերից:

Օ. Խաչատրյան

**Գրական ժանրերը 12-րդ դարի ձեռագիր մատյաններում
Ամփոփում**

Մաշտոցի անվան Մատենադարանում պահվում են 12-րդ դարից մեզ հասած 68 ձեռագրեր: Հոդվածում ներկայացվում են, թե միջնադարյան գրականության ինչ ժանրեր կան այդ ձեռագրերում: Նրանցում կան պատմություն, թղթեր, Գր. Նարեկացու Մատյանը, ներբողներ, կրոնական երկեր, հիշատակարաններ, ծիսական քերթվածներ:

Օ. Хачатрян

**Литературные жанры в рукописях XII века
Резюме**

В Ереванском Матенадаране имени Месропа Маштоца хранятся дошедшие до нас 68 рукописей XII века. Статья представляет средневековые литературные жанры, имеющиеся в этих рукописях. В них встречаются исторические труды, послания, Книга скорбных песнопений Григора Нарекаци, оды, религиозные трактаты, колофоны, ритуальные произведения.

O.Khachatryan

**Literary Styles in Manuscripts of the 12th Century
Summary**

The collection of the Mashtots Matenadaran of Yerevan includes 68 manuscripts preserved from the 12th century. The article presents medieval literary styles which can be found in these manuscripts. Those are historical works, epistles, the Book of Lamentation by Grigor Narekatsi, odes, religious treatises, colophons, ritual works.

²² Նույն տեղում, թերթ 234ա: